

**Kulturikkut saqqummeriaatsit assigiinngisitaarnerisa illersornissaat siuarsarnissaallu pillugit UNESCO-mi isumaqatigiissutip, 20. oktober 2005-imeersup, danskinit atortussanngortinneqarnissaanik Namminersorlutik Oqartussat oqaaseqaatissaannut aalajangiiffigisassatut siunnersuut.**

(Naalakkersuisut)

### **Saqqummiussissut**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

### **Siullermeerinnineq**

Naalakkersuisut matumuuna saqqummiuppaat Kulturikkut saqqummeriaatsit assigiinngisitaarnerisa illersornissaat siuarsarnissaallu pillugit UNESCO-mi isumaqatigiissutip, 20. oktober 2005-imeersup, danskinit atortussanngortinneqarnissaanik Namminersorlutik Oqartussat oqaaseqaatissaannut Inatsisartut aalajangiiffigisassaattut siunnersuut.

Isumaqatigiissut 18. marts 2007 atuutilerpoq aammalu 2. juli 2009-mi nunanit 99-init EU-millu atuutilersinneqarluni allatigulluunniit akuerineqarluni. Isumaqatigiissut Qallunaat Nunaata atortuulersippaa, Kalaallit Nunaata ilanngunnissaa piareersimaffigalugu.

Isumaqatigiissut pingaarnertut siunertaqarpoq

- nammineq nunagisami kulturi pillugu politikkimik ingerlatsisinnaanerup qulakkeerneqarnissaa,
- kulturip assigiinngissitaartuunerisa illersorneqarnissaa inuillu tunngaviummik pisinnaatitaaffiitut pingaaruteqarnerata akuersarneqarnissaa,
- kulturip siuarsarnissaanut nunat akornanni suleqatigiinnissaq,
- kulturikkut ingerlatsinerit, pigisat sullissinerillu marloqiusaanerisa akuersarneqarnissaat, tassa "kulturi" aamma "nioqqutissiaq"
- nunat siuarsarniakkat akornanni ersoqatigiinnerup siuarsarneqarnissaa, aamma
- kulturip assigiinngissitaarnerata siuarsarneqarneratalu imminnut atassuteqarnerat erseqqissassallugu, tassunga tunngatillugu nunarsuarmioqatigiinnut tamanut iluaqutaasumik kulturip assigiinngissitaarneranik siuarsaanermi nunat siuarsarniakkat suliniuteqarnerisa tapersersornissaat.

Isumaqatigiissummi tunngaviummik pisinnaatitaaffittut aalajangersarneqarpoq peqataasut kikkulluunniit kulturi pillugu politikkiminnut iliuutsiminnullu atatillugu nammineq nunagisaminni pissutsit pisariaqartitallu mianeralugit iliuutsinik aalajangersaasinnaasut, tassani siunertarineqarluni suleqataasup sumiiffiani kulturip assigiinngissitaarnerata illersorneqarnissaa siuarsarneqarnissaalu.

Kalaallit Nunaata isumaqatigiissummut ilanngunnera Kalaallit Nunaanni inatsisinik allannguissamik pisariaqartitsinngilaq.

Isumaqatigiissummut aallaqqaasiummi isiginiagassat taaneqartut aammalu isumaqatigiissummi anguniakkat tunngavinnullu missingersuutit innersuussutigalugit Naalakkersuisut isumaqarput qallunaat atortuulersitsinerannut Kalaallit Nunaat ilannguttariaqartoq.

Qallunaat atortuutilersitsinissaannut Kalaallit Nunaata ilanngussinnaaneranik apeqqut 31. marts - 17. april 2009 tusarniaassutigineqarpoq. Tusarniaaffigisat isumaqatigiissutip atortuulersinneqarnerani Kalaallit Nunaata peqataanissaa ataatsimut isigalugu akuersaarlugu oqaatigaat.

Taamaammat Naalakkersuisut inassuteqaateqarput isumaqatigiisummik qallunaat atortuulersitsinerannut Kalaallit Nunaata ilanngunnissaa Inatsisartut akuersissutigissagaat.